

# Korupshon

Den e último añanan, nos isla a eksperensíá un adelanto ekonómiko formal. Invershonistanan estranhero ta bringa pa haña un tereno, lamta un negoshi, òf haña aprobashon pa un òf otro proyekto riba nos pida baranka. Pensonadonan i otro estranhero ta bin establese nan mes aki. E kresementu di turismo tambe a produší prosperidat pa hopi parti di nos komunidad, i na mesun tempu a yuda hasi nos pòtmòni personal mas gordo.

Ma den nos afan pa prosperidat i progreso, kasi inkonsiente materialismo a krea rais i a kuminsá choka e stèndertnan moral ku antes a reina riba nos isla. Plaka a bira nos meta, nos pashon, nos bida. "God zij met ons" nos florin ta bisa; ma "Guldens zijn onze god" ta e realidat ku nos ta biba. Onestidat ta sakrifiká riba e altar di prosperidat. Tin ora ta parse ku integridat por wòrdu hañá solamente den dikshonario. I nos mester agregá den nos vokabulario moderno un palabra ku antes tabata kasi desconosí, "korupshon."

Ma korupshon no solamente ta un palabra ku nos a siña; e tambe a bira un realidat di bida den hopi sektor di nos komunidad. Awendia, ku un tiki sèn, bo por kumpra un komersiante, polítiko, trahadó den gobièrnu, kontratista, tenedó di buki, èts. Nan lo feks kualke kos pa bo, basta ku nan por haña un sierto porsentahe. Bo ke un sierto tereno ku otro hende a pidi promé? "No ta problema; mi por feks esei pa bo...si bo preis ta bon." Bo plan di konstrukshon no ta aseptabel? Un tiki sèn bou di mesa lo sòru pa kùr esei. Bo ke evitá di paga asina tantu belasting? Un par di florin por hasi hasi milager...sífranan lo bira invisibel. Bo tin purá ku un sierto proyekto? Ku e suma korekto mi por sòru ku bo lo haña preferensia, maske otro hende ta riba lista promé ku bo.

Sèn ta loke ta papia awendia. Ora sèn ta papia, diripiente, dos persona ta bira bon bròdu. Ora sèn ta papia, un proyekto infaktibel ta haña aprobashon den un será di wowo. A para bira normal pa trata hende ku un man na kara (pa "kijk door de vingers") i un man bou di mesa (pa duna òf tuma e sèn ku ta skèir aya bou).

Beibel tin rason ora e ta bisa ku "e rais di tur malu ta AMOR PA PLAKA" (1 Timoteo 6:10). I Beibel tambe, ku rason, ta kondená e piká di korupshon. "No trose hustisia, no hasi distinshon di persona i no aseptá plaka bou di mesa, pasobra plaka duná bou di mesa ta siega wowo di e sabí i ta perbertí palabranan di e hustu" (Deuteronomio 16:19). "Ai di esnan...ku ta hustifiká e malbado pa plaka pasá bou mesa, i ta kita derecho di esnan ku ta hustu" (Isaias 5:23).

Maske hende por ta ignorante di e práktika di un persona korupto i por respet'é, Dios no por wòrdu gañá i E ta yama e persona ku "ta aseptá plaka pasá bou mesa, pa dañá e kaminda di hustisia" un "malbado" (Proverbionan 17:23).

Ora Dios a duna instrukshon pa selekshon di esnan ku lo ta tantu lider komo hues di Su puebel, El a spesifiká ku nan mester ta "hòmbènan di konfiansa, esnan ku ta odia ganashi desonesto" (Exodo 18:21). Na tur nivel den nos komunidad nos tin mester di lidènan di integridat, personanan ku ta onesto i hustu, hòmbènan i muhénan ku no ta hasi distinshon di persona, hende ku no ta duna bentaha inhustu na esun ku sèn mientras esnan di menos rekursu tin ku sigui sufri. Un hende ku por wòrdu kumprá no ta sirbi komo un lider. Su desishonnan lo no ta esnan di mas mihó. "Pasobra opreshon ta hasi un hende sabí loko, i plaka pasá bou mesa ta korumpí kurason" (Eklestias 7:7). Ningun hende ke lidènan asina.

Ma asta si korupshon ta bira un birtut riba nos isla, ketu bai e persona ku ta aprobá pa Dios ta "esun ku ta rechasá ganashi inhustu, i ta sakudí su man, nengando plaka pasá bou mesa" (Isaias 33:15). Tambe ta bon pa nos korda ku maske hende korupto bida largu i por logra haña nan gana dor di nan sèn, dia ta bin ku e tin ku para dilanti "e Dios grandi, poderoso i teribel, ku no ta hasi distinshon di persona, ni ta aseptá rekompensa korupto" (Deuteronomio 10:17). Ta klaro ku ningun montante di sèn por kumpra Dios. Su hustisia ta perfekto pa tantu e víktima komo esun kulpabel di korupshon.